



PERDANA  
LEADERSHIP  
FOUNDATION  
YAYASAN  
KEPIMPINAN  
PERDANA

PERDANA LIBRARY  
PERDANA LEADERSHIP FOUNDATION  
NEWSPAPER CLIPPING

Newspaper	UTUSAN MALAYSIA
Date	12 SEPTEMBER 2016

# Ambil iktibar peristiwa korban

Um - 12/9/2016

Oleh **SAFINA RAMLI**  
pengarang@utusan.com.my

■ KUALA LUMPUR 11 SEPT.

**S**EMPENA Hari Raya Aidiladha yang disambut, Perdana Menteri, Datuk Seri Najib Tun Razak mahu umat Islam mengambil iktibar daripada peristiwa korban yang dicatatkan di dalam Al-Quran mengenai kisah kecekalan serta keteguhan Nabi Ibrahim a.s dan Nabi Ismail a.s.

Najib berkata, semangat seperti itulah yang perlu dihayati oleh umat Islam dalam mengharungi sebuah perjuangan.

"Ibadah korban bukan sekadar ritual yang berkala tetapi meletakkan dalam jiwa sejauh mana pengorbanan kepada agama Allah dalam menjalani kehidupan sehingga mampu mengeneipkan kepentingan diri dan tuntutan peribadi.

"Pengorbanan memerlukan ketabahan dan ia harus bermula daripada diri sendiri," katanya di dalam perutusan sempena Hari Raya Aidiladha di laman blog [www.najibrazak.com](http://www.najibrazak.com) hari ini.

Menurut Najib, sambutan Hari Raya Aidiladha pada tahun ini perlu dijadikan sebagai satu titik tolak untuk semua umat Islam terus bermotivasi dan komited dalam meningkatkan mutu serta nilai pengorbanan untuk menjadi hamba Allah yang dirahmati.

"Bersama kita berjuang dan berkorban membina masa depan negara yang lebih maju dan progresif sebagai sebuah negara Islam yang berteraskan Maqasid Syariah," jelasnya.

Dalam catatan tersebut, Najib juga menyeru agar umat Islam untuk sama-sama mendoakan kesejahteraan dan keselamatan negara ini.

"Akhir kalam, saya dan keluarga mendoakan, buat mereka yang berada di Tanah Suci, selamat mengerjakan ibadah haji dan semoga mendapat haji yang mabrur.

"Bagi mereka yang lain, marilah kita menyertai para Hujjaj dengan doa restu, takbir, tahmid dan tahlil di samping melaksanakan ibadah korban dengan menghayati ruh penyariatannya," jelasnya.

Sementara itu, Timbalan Perdana Menteri, Datuk Seri Dr. Ahmad Zahid Hamidi berkata, sempena Hari Raya Aidiladha ini, umat Islam perlu bersatu dan

menghentikan perbezaan agar kesyumulan agama Islam terus dipelihara.

"Umat Islam di negara ini dan seluruh dunia perlu menghadapi cabaran dan permasalahan dengan penuh cekal.

"Ingin saya ingatkan diri saya dan juga umat Islam yang lain agar menghentikan perbezaan antara kita demi agama Islam," katanya melalui laman YouTube hari ini.



NAJIB TUN RAZAK